

【帶阿姆食飯】張美容原作

逐年差毋多會到母親節該下，斯會看著恁泥个文章，裡肚个意思大勢都講：「 偲等細細該下，食飯食都一頭一面、滿哪搞去狼離狼犁，爺哀毋會打也毋會罵，細心細意教偲擎筷、收擎；學行該下，爺哀毋盼得偲等跌倒，牽緊偲个手，教偲學打燈、學徒步，毋驚麻煩、毋驚辛苦。這下爺哀多歲咧，手腳無恁生活，長在食飯時節飯糝溶溶跌¹，行路時節踉踉跌，做子女个愛多兜耐心同佢搵手，毋好棄嫌佢、對佢無好聲說。」見看著恁泥个文章，吾个心肝肚斯有淦淦个感動，目汁也硬硬會跌落來！

吾姆今年九十歲，情形同文章肚寫个共樣共樣。前幾年還會煮飯、畜頭牲、打板，這兩年看緊弱落去，出門愛坐輪椅、食東西像掖秧个樣、同人講話總係人講東佢應西。看著這種情形，吾兩姊妹無麼敢帶佢出去食飯，一方面嫌費氣，另一方面驚餐廳个頭家毋歡迎，所以逐擺帶佢出去寮，到晝斯買兜東西帶轉屋家食。

直直到有一擺，聽著老弟講佢一個人帶阿爸、阿姆去石門水

庫寮，順續在該食晝，該日堵好禮拜六，餐廳人客當多。老弟輪緊搵坐輪椅个阿爸、阿姆入去，偲聽著黏時問：「 頭家會毋歡喜無？」言知，頭家娘毋單淨無嫌厥等人少又勞煩人，還一路喊大家閃開兜，留一條較闊个路分厥等過，盡感心个係，頭家娘又推一個窗門脣看得著湖景个位分厥等坐，吾心肝肚想，頭家娘定著係分吾老弟个孝心感動。偲知差咧，「 孝心」係美德，人看你對爺哀恁有孝，安謐斯有，哪會博人惱呢！

想著頭擺同爺哀共下出去食飯，單淨陪厥等食飯，同厥等打下嘴鼓、問安斯使得咧，當自然²。這下無共樣咧，毋係陪阿姆食飯，係安做帶阿姆食飯。食飯該下，老弟驚阿姆食去歸身，在厥个胸脯³前圍一條圍帕；驚阿姆食忒少，還密密同佢挾菜拐佢食；又驚阿姆食湯哽著，一湯匙一湯匙慢慢飼佢；還愛一到一到將阿姆黏在嘴角个飯菜拈撇、粹淨。看著恁泥个情景，偲黏時想著母親節該篇文章，無毋著，這下老弟做个，斯係頭擺阿姆一一為子女做个，做子女个仰脣使得棄嫌爺哀！哪會使得推懶！

¹ 溶溶跌：音 dab`dab`died^；紛紛掉落。

² 當自然：音 dong+ cii`rhen~；很自在、舒適、輕鬆。

³ 胸脯：音 hiung+ pu~；胸前。

108 年全國語文競賽客家語朗讀文章教師組（大埔腔）

編號 02 號

【牆頭脣个黃梔】彭瑞珠原作

學校个牆頭脣有一頭黃梔花，分人種在小型焚化爐脣，大樹會遮著厥東片析日頭，比人較高个牆頭又籀在厥西片析，因致，厥个日照無已足。好得，地泥下个泥肉賁，厥个生命力又強，佢斯逐日躔緊牆頭个高度緊生緊高。一陣春分个大雨過後，佢還盡命牯伸枝出葉，開出雪白个花。

「唔，還香哦，係黃梔花！佢盡中意个花。」帶學生去拚掃个佢，用手搨掃樹葉，頸根掇¹轉黃梔花，鼻公鼻著該花香，全全無想徙步，牆頭該片還有滿天个紅霞。

第二日朝脣入教室，仰會鼻公都還鼻得著該花香？哎哦，毋係佢心神，係吾事務桌面排滄滄个花。一來花香錫人，二來佢會愁牆頭脣該頭黃梔花，害吾心肝嘎啱啱跳、啱啱颯。毋過，佢還係軟聲問：「麼人呢？係麼人摘恁多花送分先生係無？」歸間教室个學生，怕係分佢又歡喜、又愁慮个聲說搥去哈哈大笑。

「先生，你揣啊，你揣看啊！」

阿文？阿俐？毋係，係阿航！阿姆哀唷，係該上課尋人毋著，下課撩刁、手銃、屋家又混雜，全學校都無人奈得佢何个阿航！這擺正經死皺咧，該頭靚靚个花樹，定著頭疤面疤，伸無半條命咧！怪得，昨晡臨暗阿航共樣無去拚掃，還不時在吾脣項跳上跳下。

毋過，佢還係客氣同佢講：「恁勞瀝哦！」心肝肚毋放心，又試試探佢：「你哪來恁多个香花呢？」

佢難得在教室企都正正，笑頭笑面、風神轟天應佢：「你毋係講，你盡中意這花？吾屋家當多哦！嘻嘻，吾奶講，愛送分先生哦？去摘，去摘，煞猛摘！你還愛無？天光日，佢過摘分你！」

帶核混雜又略略歪勢个心情，佢影過該一桌个雪白，看緊佢：「勞瀝你，恁細義送先生，恁香个花。」該日个花香，佢久久記得，也會恅起牆頭脣个黃梔花。雖然，厥个生存條件毋好，毋過，佢也有厥等个單純雪白，還會分享花香分逐儕人。

¹ 掇：音 ngau²；折、轉。

【幸福】李幸妃原作

麼个係幸福？仰脣正算係有福氣？你識感覺著幸福無？

佢記得有人恁泥講過：「假使你有一粒蘋果，佢也有一粒蘋果，佢相交¹這兜蘋果，逐儕人本本還有一粒蘋果。毋過，假使你有一種想法，佢也有一種想法，佢人互相交流這兜想法，逐個人个心斯會有兩種無共樣个想法。」

在教學个過程中，真好也已慣勢同細人分享生活个點點滴滴，可比講：這站時間聽著个笑話、出去遶寮看著个心色事，分享讀著一本好書裡肚个好句語，抑係現子時社會在時行麼个東西這兜；漸漸，細人也會在下課時節，走過來同佢講心事，想聽吾个想法；無定著會有共樣个感受，成半下佢單淨斯做一個無聲个聽眾忒等！記得有一擺，一個笑咪咪个細阿妹，恬恬行俛吾圍身細細聲問講：「先生，你敢知麼个雞走盡遽？」佢恹去恹轉，頭那緊爪，額結結應講：「敢係火雞？火雞走真拚哦！」佢講：「毋著！毋著！毋係火雞，係麥克雞！因為『麥克雞塊²！』『快』斯係拚啊！著無？」聽了兩儕笑去哈哈滾，笑都愛搨肚

¹ 相交：音 siong+ gau`；交換。

² 麥克雞塊：音 mag` kied^ gie+ kuai`；麥克雞塊，諧音麥克雞快。

屎！有影啦，細人个想法直接又單純！該時節，佢試著幸福斯係分享。

逐擺到當晝歇暍之時，同事定著會留佢在學校共下食！毋過，佢總係笑笑回講：「勞瀝啦！佢轉去屋家食！吾姆會等佢轉屋食飯！」轉屋家同世大人共下食飯，變做這幾年一等有福氣个事。進前細漢老弟無在該件事，分佢著切自家無好好把握，兄弟姊妹共下个時間，應該愛互相關心同注意，愛加講幾句話！屋家好恬恬恁恬靜，正知兄弟姊妹會冤家、相爭、相罵、受氣，不管時都係一種福氣！看著桌面阿姆煮个飯菜，雖然毋係麼个山珍海味，單淨簡簡單單个煎魚、炒薤菜同番薯飯忒等，毋過食落肚屎，甜在心肝頭，還會坐共下食阿姆煮个飯，該係一種有福氣个味瑞！

佢對幸福个想法，跔緊歲數越大越改變，經歷个事情越多越珍惜。佢想望个幸福真簡單。逐朝脣目珠擘金，看著日頭照對窗門入來，日頭光走入來同佢講恁早；啟一下大氣，感覺著還生个歡喜；牆頭脣該頭木棉樹，柑色个花蕾跌落地泥下，斯像同大地鋪一領柑色地毯，該落花有落花个靚；探頭看天頂，雲在走相逐鳥在園人尋，感覺著世界在停動个節奏。幸福愛用心去體會，用心去感受，心肝肚有愛、還有感恩个心，幸福斯係恁簡單。其實做一個知足感恩个人，逐日做下係幸福快活个，做下會享受著有福氣个好味瑞！

【若个抑係吾个】劉玉蕉原作

人在世間，短短幾十年，萬事萬物，時時變，日日換，麼个係若个？哪個係吾个？等你雙手一放，氣脈一絕，做下係天公个，該兜你捨毋得，往時嘴項輒輒講个「吾」，到這下做下變做「曾經」，像雲，像煙，過撇斯無留半屑蹤跡咧。

該日，載阿嫂去山頂避暑，車行過該片，佢識喊佢安做「吾个山」个山林，遠遠吊望，大樹還係高天天，綠葉榮榮，哪係柿樹？哪係梅？目珠一瞞斯打濛紗咧！單淨知講，這下該草竇園得老虎著。阿嫂問：「愛落去看看、遠遠哩無？」佢應佢：「傷心所在，莫看有較贏！」話出一半，車肚个空氣一下斯凝凍¹咧！車緊行，兩儕恬恬，想个係共條事，恁个係像煙、像雲个「吾个」。

家官好種蘭花，傳到老公共樣恁好，平常時除撇上班，摸花、顧花个時間占撇大半，長著錢咧，心心念念斯想買一埕地來搭花園。田地、山林、沙埔遠撇好多所在，臨尾，相準天冷个好地理，陽面山連核鋪平个旱地，盡錫人个係合界該條坑，清淨个坑水長年流無停，白鶴花排列个樣，企在兩片脣，開花時節斯像

一陣白鶴，停在坑脣葉面，風一吹，撲啊撲，斯撲到人个心肝肚去咧，淡淡个花香，撩人鼻公，像搞園人尋个細狃²樣，無注意著咧斯揸你一下，分人有期待、有歡喜。

寮日，吾歸屋家人打早斯出門，食个、搞个、做事个工具款款擎，一臺車斯堵好尖滄滄，準遠山花个樣，定定駛上山。山風涼涼，坑水清清，細人同老公搵手摟泥結礮，想做細陂塘來畜魚，汗流罅咧，斯係佢三兄弟个搞寮時間，捉魚搞水，打草蝨、攀籬吊壁……，搞到貶轉來。橋下个大石牯係吾个洗衫枋，鞋一脫，屎肫一頓，斯真像樣哩啲，衫褲个啊个，分人恁想著往擺老屋後背該條大水溝，水共樣恁清淨，个衫褲个動作也共款無變，孤孤細手變大手，佢既經係三個細人个阿姆咧！

好光景過無兩年，頓柱牽棚正搵好，壞咧！921 大地動一搖，崩崗敲切，走山走去無款，先前盡錫人个山坑水，一起惹面斯麼人都毋識咧，細坑變做大河壩，啲啲滾³拚往下个山坑水，將歸个旱地切撇兩股，單淨伸著澄澄个山林，還過山下一條車路，白鶴花該迎核風開展个笑容咧？無咧！細人、大人用汗水換來个陂塘、花園咧？跨水走咧！一屋人該央時留在山林肚个笑聲，隨核風，流流流流，遮蔭个大樹知得，吾這兜「識」在這位歡喜停途。

麼个係若个？重要無？水一沖、火一燒，做下變做記憶，你抓捉著麼个，無啊！

¹ 凝凍：音 kien` dung`；凝結。

² 細狃：音 se` o` bid`；小孩的暱稱。

³ 啲啲滾：音 bo` bo` gun^；形容水勢盛大。

108 年全國語文競賽客家語朗讀文章教師組（大埔腔）

編號 05 號

【蓮霧樹下個花園】羅紫云原作

吾屋家个屋側角，有一頭蓮霧樹，種有 30 零年咧，樹身當旺，有青青榮榮个樹葉，逐年舊曆五月邊斯會開花，毋過，毋識打有蓮霧好食，實在奇怪，鄰舍講佢係半公嫵，會開花毋會結子。雖然無收成，毋過蓮霧樹斯像一支大青遮，樹下涼沁沁¹，係一個已靚已好奈涼个位所哦！

佢在該頭蓮霧樹下，種有當多種草花，有好陰涼毋好晒日頭，無愛忒多水分个「多肉植物」，像油蔥、佛珠、白牡丹、水芙蓉、海芋、藤類這兜，有个吊在樹極頂，有兜跔對樹頭下排做一個圓圈。愛淋水、愛日頭晒、會開花个花種，像大紅花、啲啲花、碗花、蘭花、玫瑰花、惜圓花、繡球花、蓮花、芙蓉、蓮蕉花這兜，斯排在外圍做第二個圓圈，有兜佢知名个，有兜佢毋識佢，總講一年四季都有無共樣个花開，分人欣賞看靚。

這個同心圓个花園，係吾好朋友，該毋單淨係花園忒等哦！也係一個細細个動物園，有鳥、蚊、蝶、蜂、揚尾、蟾蜍、蜈，還有逐朝脣暗晡，都愛撮一撮飼料餵佢个——魚同田螺。魚、田

螺畜在蓮花鉢肚，厥等个組合斯係這下當流行、時尚个「魚菜共生」，魚食蚊，田螺食垃圾，淨化水質，蓮花个養分斯對魚同田螺來，係當環保个方式哦！

事做撇，若有閒，佢斯會去花園，擲草、捉蟲、淋水、賞花、看魚，同該兜花花草草講話，摸摸搥搥，這係佢逐日歡喜甘願愛做個頭路，毋管發風落雨，都定著會去遠遠看看个位所，有閒時節兜一張凳坐核看魚，看該魚屎拙扭啊扭，無愁無慮，自由自在，樂線樂線个樣。吾个心斯開，天轉笠嫵花，一身个疲勞也斯消除撇咧～。

成半下還會帶鄰舍、朋友共下來參觀吾个花園，坐奈打嘴鼓，共同研究推廣「魚菜共生」个做法。人多意見多想法也多，佢接受大家建議，慢慢規畫、改進，加幾隻醃缸做第三個同心圓，醃缸肚畜福壽鯽，面頂種青菜、瓠瓜，有人客來，菜斯便便咧！雖然這花園細細，毋過這下變都當齊全當靚咧。

¹ 涼沁沁：音 liong`sim`sim`；清風徐來很涼爽。

108 年全國語文競賽客家語朗讀文章教師組（大埔腔）

編號 06 號

【毋會肚屎枵个阿媽】曾菁怡原作

看著歸桌錫人个料理，炒肉、爇肉、豬腸炒薑絲、肥湯炆筍乾，還有佢盡好食个菜脯卵，單淨鼻著該香醇醇个味瑞，斯分人口涎水溶溶跌咧。

「阿媽，遽遽來食哦！」「佢忍毋核先拈一坵炒肉放入嘴項。

「若等先食，佢還毋會枵。」阿媽還在翕熱个灶下無閒濟借。阿媽个手路已好，歸桌个飯菜黏時斯分吾等食都會淨。

食飽飯，阿媽總會切一盤果子分大家食。

「阿媽，共下來食啊？」佢喊行往出个阿媽。

「若等先食，佢還飽餬餬。」阿媽笑笑應佢。

逐擺斯恁泥，係有煎魚，阿媽都會講：「佢好嚟魚頭，魚頭留分佢斯好。」係有雞肉，阿媽又係講：「佢好食雞爪，該留分佢斯好。」係有雞卵糕，阿媽又會講：「佢毋好食甜，若等食斯好。」阿媽總係食恁少，從細，佢毋識聽佢喊過枵。

逐擺有錫人个好料，阿媽盡輒講个斯係：「若等先食，佢還毋會枵。」無斯講佢食無恁多，喊吾等做下食撇，毋使留分佢。

吾等也正經慇慇相信阿媽食毋落，煞猛食。

等到自家做阿媽，佢、妹講愛食麼个，佢斯盡命拈變出來；人講哪位有好食个，斯趑趑走去買轉來分細人享用。心肝肚總係掛吊佢、妹愛食麼个？敢有食飽？會枵無？看著細人食去笑咪咪，佢斯感覺心滿意足，肚屎也飽咧。原來，毋會肚屎枵个阿媽，係因致子女滿足个笑容，係對子女个愛惜，係恁泥个親情啊！

想著阿媽頭擺總係坐在桌脣，看吾等食相兇狂將飯菜划淨淨；想著阿媽逐擺對市場轉來，總係有買吾等好食个肆秀，自家嘎無麼有食；想著阿媽切好歸盤个果子，自家罕得拈一坵來食，吾个鼻公玄玄風試著一陣酸軟，目珠嘎矇矇咧，阿媽毋識講佢有幾惜吾這兜，毋過厥个行動既經表達出偉大个母愛咧。

今這下，阿媽个牙齒毋好，背囊瘟瘟，動作也較慢板咧，佢還係習慣坐在脣項，溫溫講：「若等先食，佢還毋會枵。」吾心肝肚已毋盼得，阿媽到老還係驚怕吾等食毋飽、無罅食。

好得，佢毋會過慇慇相信阿媽食毋落咧，佢牽緊阿媽个手坐俚來，同佢講：「阿媽，佢愛共下食正會有好味瑞啲！」

108 年全國語文競賽客家語朗讀文章教師組（大埔腔）

編號 07 號

【尋轉火黏蟲】廖惠貞原作

講著火黏蟲，斯會想著頭擺，該係童年盡靚个回憶。

還細時節阿奶輒輒會帶細人唸：「火黏蟲，唧唧蟲，楊梅樹下吊燈籠，燈籠光，照四方，燈籠暗……」暗晡頭，伙房屋个細人洗好身腳，斯會兜矮凳插草蓆去大禾埕，又搞又唸童謠。一半下阿奶阿太擘地豆，吾等斯拿地豆莢夾耳公，做耳鉤戴。

細舅會帶吾等一陣細人走去菜園田脣，逐一瞞一瞞个火黏蟲搞，阿奶斯會拉長聲頰喊：「外背暗摸胥疏¹，遽遽轉來哪！莫弄火黏蟲啦！佢也係一條命！」一陣人走轉大禾埕，搞踢嘍嘍²，搞園人尋。火黏蟲也會飛到大禾埕來！較細漢个細人會睡在草蓆頂唸「月光華華，細妹煮茶……」算天頂淦淦个星，足相³个叔婆太又會咻：「毋好指月光！會分佢割耳公！」

來臺北讀書，好朋友戴在大溪烏背山頂。生物先生識帶吾等盤兩座山去採集。山頂無牽電，伯姆還點蠟燭煮飯，暗晡頭也點蠟燭討論，火黏蟲飛入廳下來鬥鬧熱。先生講「山頂無電無光

害，火黏蟲正使得生存！」有一擺同朋友一心愛去山頂尋佢，無堵著，毋過嘎分臨暗滿山滿坑个火黏蟲嚇著咧，正經「滿山塘滿樹，飛光千千點」个樣，一大片金金像天頂个星跌落來；又像樹頂開一蕊一蕊金皙皙个花。兩儕看去呆撇⁴，行這掖正經有價值！

識同小朋友講起「火黏蟲」，已多人無看過，講著《火黏蟲个墓埔》斯知咧，這係日本宮崎駿先生个動畫，14 歲个阿哥同 4 歲个老妹在美國空襲該下失撇阿姆，兩兄妹去靠親戚，到尾戴在山窿，生活當苦，毋過暗夜使得看著滿天飛个火黏蟲。老妹因致營養無罅死撇咧，實在衰過哦！乜識聽朋友講佢去澳洲，參觀峽谷底个火黏蟲，坐細船時不准人發出聲哨，也使毋得翕相。昂頭⁵看往上，上千上萬个火黏蟲比比⁶停在嶼頂頂，像歸片个寶石發光，逐儕都看去嘴開開。朋友對厥等恁有心去愛惜火黏蟲，試著當感動！

已久無看著火黏蟲咧，頭擺莊下暗夜一瞞一瞞个身影，幾時能過看著？大溪、澳洲、《火黏蟲个墓埔》該火黏蟲帶來个歡喜同心酸。偌盡懷念个還係田寮莊下，竹籬圳溝脣个火黏蟲，哪央時使得尋轉火黏蟲，尋轉無愁無慮个童年。

¹ 暗摸胥疏：音 am`mo+ si`so`；很暗。

² 嘍嘍：音 kong+ kong'；鐵罐子。

³ 足相：音 ziug^ siong`；指人性情不穩，易怒、孤僻、反應過當，意同孤老。

⁴ 呆撇：音 ngoi` ped^；發愣。

⁵ 昂頭：音 ngong^ teu`；抬頭。

⁶ 比比：音 bi` bi`；多而密集。

【雞肉絲菇】張捷明原作

「啊！雞肉絲菇欸！俚來擲。」

「毋使恁鬥緊！等佢大，轉晝正來擲。」

山項有當多好食个東西，毋過有一樣單淨山項人獨享，街路人毋單淨想食買無，係根本都毋知有恁泥个好東西，這斯係雞肉絲菇。山項人有畜雞，毋過無年無節無劇雞，雞肉絲菇斯係平常時斯食得著个免費雞肉。

若係講松露係法國人「灶下个鑽石」，該雞肉絲菇斯係山項人个「桌心」，這係盡稀罕个一路菜，正經个山珍。

雞肉絲菇有兩種，一種係大蕊个，一搭正生著一蕊，斯像單丁子。另外一種係細細蕊一生斯一大巴¹，像歸家人共下，有幾下十蕊，這安做姊妹菇。兩種各有特色，共樣恁難尋、共樣恁好食。

雞肉絲菇生在竹園肚、樹園肚、草頭下，看著這種上天賜分偲等山項人个美食斯像著著獎²，該係運氣，跔跔去尋乜尋毋著。毋過，毋係見樹園斯有，還愛看時看刻看天時。燒暖个天時加上落過雨水正會生，半朝脣斯鑽出泥面、臨晝開始開弓，像一支歸

身牙白色个細遮，到下晝一兩點斯開始過潦³，所以盡好个採收期係臨晝，忒早無額，忒晝又過潦。

因致這種山珍使毋得放久，擲著萋萋拿來炒菜合味⁴盡好，尤其係煮筍湯，又嫩又滑又清甜，毋過愛當日享受，無法度留到隔餐、隔日。

俚識一個農務局个雞肉絲菇專家宋先生，佢講這係現代科技無法度用人工培養个菇種，因為該愛有幾下種關鍵條件共下存在，第一係地泥下一公尺愛有白蟻竇，第二該位愛有菇菌，第三有白蟻竇同菇菌，還愛有一種微生物做媒人，過來愛氣候溫度同堵好个水氣，這兜條件人工還無法度解決，因致單淨還係山項人獨享。

還有一個問題，恁軟恁滑个雞肉菇，愛仰脣對恁硬地泥下一公尺鑽上泥面呢？原來菇頂尖頭有一砵比鑽石還較硬，幼幼个生長點負責鑽泥。

雞肉絲菇做麼个會安做雞肉絲菇，當然係又嫩又滑又清甜，菇頂遮比雞髀還較好食。還有一樣係雞肉絲菇个菇柄，菇柄其實無菇遮恁滑，毋過菇柄擘開了後係一絲一絲个肉絲，食起來正經像麥當勞个雞肉絲。

俚後生戴在山項該時節，食過當多雞肉絲菇，因致當懷念這山珍土產，見擺轉山項斯會去尋，毋過，毋知係毋係這下酸雨忒多造成生態毋平衡，連留在山項个朋友都講當久無食著咧。

¹ 一大巴：音 rhid[^] tai^ˊ ba^ˇ；一堆。

² 著著獎：音 chog^ˊ do^ˊ ziong^ˊ；中了獎。

³ 過潦：音 go^ˊ lau^ˇ；過熟。菌傘下方開始褐色敗壞。

⁴ 合味：音 gag^ˊ mui^ˊ；調味。

【桂花香】邱坤玉原作

人企得正，得人惜；花開得香，得人愛！毋過「樹愛軟枝，人愛硬程」正有德！

阿爸盡好桂花。在美濃老屋个門口種有一頭桂花樹。該桂花單淨一枝梗，透路上到像佢恁高，歸枝樹身企都澄澄澄，樹頭怕有吾腳囊肚¹恁斗²。

聽講枝骨澄个桂花樹，價數已好。因致，阿爸將該桂花照顧去緊來緊高，身材緊來緊靚，葉也緊來緊榮，到佢讀國中个時節，想摘桂花還愛澄腳尾呢！

坐在花樹下，佢注意著个係，該樹葉節目暴出手指尾尖个花蕾，桂花散出傳到遠遠淡淡个蜂糖香。桂花會恁得人惜，實在係因致厥个蜂糖香味，淡係淡，毋過香味傳已遠，已耐香，卵黃色个桂花，斯像偲黃皮膚个人，已靚又已耐看！

這頭桂花樹受著特別个款待，阿爸愛佢將樹頭下个四圍清清淨來，驚怕歿撇个樹葉揸緊會害樹頭破病，燥撇个樹極愛鋸撇正靚，樹影下新綻出來个樹秧愛徙走，無身分个雜草愛擲淨來，儘

採毋得。清淨了後，愛用細細箒³个紅紙，將桂花樹身圍一圈，還愛貼五福符，對年三十起勢逐日朝脣暗晡愛燒香，年尾拜到年初。

佢知厥个花期短短忒等，中意桂花个「色」「香」係一種精神个安慰，係時間在該流轉慢慢褪色了後，正發覺个靚！係佢淡淡个香味毋同玉蘭花、七里香爭排名；細細圓圓个花型黃黃白白，也毋同牡丹花、燈籠花爭大細；簡單到無像蘭花有牽錦霞樣个線條。阿爸認為，該桂花係盡分人尊敬个君子。

宋朝李清照在詩肚，有形容淡黃色的桂花，暗淡輕黃、體性溫潤，色淡香濃，在讀書人心目中係百花中个第一流。君子立身處事在安於幽靜，毋惹人注意，單淨留香味在天地。無必要像大花招招搖搖，錫來蜂蝶傷身性。

佢逐朝脣暗晡愛燒香。打早䟽床，去拈一盤桂花來敬灶君爺；臨暗時節，同該盤桂花拿來灸茶，泡出个桂花味鼻起來當溫順，花茶色清淡，食著順喉。恁泥跣阿爸虔誠用桂花拜喏拜灶君爺，直直拜到阿爸百年歸仙了後。

這頭桂花嘎因致大路拓寬，分怪手同無知識个工人，少一份耐心毋肯先來斷根，少一份軟心無真心相惜，無想著該花榮青蔭、薄皮清秀个桂花，斯恁泥分該怪手強制摟開，無法度翻生嘎來燥撇，正經當打爽，花樹有情定著會痛心，傷心到死。

¹ 腳囊肚：音 giog[^] nang^ˇ du[^]；小腿後方多肉的部位。

² 恁斗：音 an[^] deu[^]；那麼粗大。

³ 箒：音 be+；片。

【答識】賴維凱原作

原本愛回收个大紙落，嘎看著裡背有砵一坭細月光餅。算來這歲數比佢還較後生个同事，已知得麼个安做「答識¹」，心肝頭試著一陣燒暖。還細該下，阿姆見擺擺燒爇爇个鉢去分阿爹、阿奶，下次擺過去收鉢个時節，鉢肚總係重鈹鈹，毋係進口个糖斯係餅，毋係江瑤柱²斯係福神菜，逐擺都無麼个共樣。佢見看著鉢一送轉來，斯會想打開來看，毋過，手一伸啊出去，定著斯會有筷頭啣啊過來，因致恁泥，吾等會乖乖等阿姆撿拏定貼了後，正跔阿姆打開來看裡背有麼个？鉢肚逐擺都分阿爹阿奶洗淨淨又掙去光生光生，裡背斯放兜吾等好食个肆秀。

「答識」，毋單淨係「答識」！從細到大，若係生活在這裡背个人，總會有體會。毋過，這裡背个人情世故、微毛末節，無法度有準則、詳細寫出來，也係吾等這世代个後生人，仰脣都無法度「答」出來个……。

朝脣頭，阿姆去遠過「文光哥」了後，目紅鼻紅，同佢講佢毋識看過个阿伯仰會恁衰過，因致擔著糖尿病，這下又青暝咧。

佢毋識這阿伯到底係麼人？過後正知「文光哥」係大舅姆在臺灣該下，一等照顧佢个好朋友。吾心肝肚恁：這同阿姆有麼个關係？乜無聽過大舅姆有特別交代，喊阿姆去遠這個朋友，算來係無麼个熟事个人。暗晡頭，阿姆拗緊重鈹鈹个營養品，同上背寫葡萄牙文个箱，監佢同佢抄一下巴西个住址，佢愛寫信分大舅姆。

阿爸對外背正轉來，斯分阿姆吩咐去買寄航空个信落，佢一聽啊著斯在門口嗶嗶嗶嗶³：「又毋早兜講，今這下起風咧，又落恁大个雨，愛喊佢仰脣買？」阿爸平常時斯已會同阿姆「應嘴應鼻」。「毋會著水衣咩？麼人會知你頭到去哪啊？喊你買斯去買！還恁多麼个好講个？」照阿爸平常时个性體，佢聽著恁泥个應話，阿姆絕對會嘍毋燥⁴，無恁著阿爸恬恬無講一句，水衣一著，奧多拜⁵騎啊著斯去買咧！

自阿姆擔著癌症了後，大舅姆三不二時，斯會搭兜營養品分佢，這下大阿舅過身恁多年咧，乜共樣定期搭來，無一擺同阿姆算過錢。啊！「文光哥——大舅姆——阿姆——文光哥」，佢一下斯恁通咧！毋使揣乜知信裡背會寫麼个！毋使問乜知阿姆做麼个會去遠文光哥咧！信落項，佢定定寫，寫毋著，扯撇，寫過！寫毋靚，扯撇，寫過！

¹ 答識：音 dab^ˆ shid^ˆ；本指舊識有紅白喜事，彼此包禮回謝，在此特指彼此禮尚往來的酬答。

² 江瑤柱：音 gong+ rheu[˘] chu+；干貝。

³ 嗶嗶嗶嗶：音 gau[˘] gau[˘] gau[˘] gau[˘]；嗶嗶咕咕。

⁴ 嘍毋燥：音 sai+ m[˘] zau+；指嚙不下這口氣。

⁵ 奧多拜：音 o+ do[˘] bai[˘]；源自日語オトバイ，摩托車。

【畜蜂個人】李秉璋原作

「來哦！來買蜂糖！來買蜂糖哦！蜂糖無純，剝頭！」這係一個真舊真久个笑話。剝頭，毋係剝生理人个頭，係剝蜂个頭。這雖然分人試著好笑，毋過準講想買著百分之百純蜂糖無恁簡單，市場有真多假个蜂糖，有用果糖去啟，也有用糖飼蜂个，真多把戲。這斯係講蜂糖係真寶貴也係真貴个東西。這幾年來蜂死撇已多，蜂糖个價數斯緊來緊好，毋過畜蜂个人也真擘心¹，蜂若死恁多，厥等乜會無蜂糖好收。

畜蜂个人像「游牧民族」，長年透天愛滿哪走。花在哪位，佢人斯在哪位。冬尾个油菜花田，三、四月个荔枝開花，接落來換牛眼花開，厥等愛躡花徙位，哪位有花，人斯躡到哪位，愛上山也愛落平洋。攞鴨个人攞²幾下千隻鴨，毋過畜蜂个人手頭係幾下十萬隻，幾下百萬隻个蜂。手握百萬軍以外，也愛有分蜂叮个心理準備。

畜蜂人係一代接過一代，在阿姆个肚屎斯躡阿姆在畜蜂。荔枝花同牛眼花開个時節，斯係盡無閒个時，愛日合夜做事，將蜂

糖收起來，一箱過一箱掀開，將蜂竇拿出來絞蜂糖³，三百箱个蜂箱使得收五、六鐵桶个蜂糖，一桶差毋多有五百斤，毋過一年盡望斯望這時節。歸屋家人做下喊來搵做。世大人這時節會講：「做事手腳愛拚，手腳若趁趁⁴斯做無好食。」收好个蜂糖同傢伙頭也愛收起來放。因致愛特別起一間倉庫來用，好分蜂糖有一個好所在放。

寒天時，蜂無東西好食，這時節斯愛用花粉無斯糖來飼蜂。飼蜂个時節，頭那戴套網个笠嫲，著長袖衫、長褲、長笊鞋。去到畜蜂个所在，先將樵放落煙罐⁵，起火了後，手戴手落拿煙罐掀開蜂箱蓋，手搯⁶煙罐，用煙罐个煙逐蜂。過將內肚一坭一坭个蜂竇拿出來檢查，看有蜂王無，若蜂王忒多斯愛將盡砸礮个留落來，一等驚斯係蜂王死撇，這箱个蜂斯做下毋食東西咧，會死淨淨。蜂箱內蓋若有結蜂蠟，斯愛鏟起來，同蜂箱整理好勢，分蜂有一個素絲个竇。鏟起來个蜂蠟，使得食，食起來像樹乳糖。成半下蜂箱肚个蜂忒少，還會有蟻公來食糖同蜂蟲，成半下也有人會來偷拿蜂箱，這兜做下係畜蜂人一等掛心个。照顧蜂斯像顧自家个細人樣，驚佢寒、驚佢無食、驚佢病、驚佢分蟻公欺負、驚賊來偷。直直愁慮到明年春天，這香香甜甜个蜂糖，斯係畜蜂人盡好个禮物。

³ 絞蜂糖：音 gau^ pung+ tong^；將蜂巢片放入採蜜機中採集蜂蜜。

⁴ 趁趁：音 so^ so^；做事笨拙。

⁵ 煙罐：音 rhen+ guan^；噴煙器，用來驅趕蜜蜂，避免蜜蜂叮咬以方便工作。

⁶ 搯：音 ed^；壓。

¹ 擘心：音 bag^ sim+；心中揪結煩惱。

² 攞：音 liab^；驅趕。

108 年全國語文競賽客家語朗讀文章教師組（大埔腔）

編號 12 號

【倒垃圾】林伯殷原作

逐日臨暗六點零，除了清潔隊放寮日以外，隔壁鄰舍做下會攞大包細包个垃圾行出門，企在大路脣等垃圾車，等到車隊駛俾來，大家熟絡熟絡將垃圾倒入行頭前个垃圾車，正過翻轉身同壞銅壞鐵交分座後个資源回收車，雖然，大家對倒垃圾早都當慣勢，毋過，三不二時還係會看著有人揸緊垃圾，在大路項逐垃圾車个情況，該時，實在毋知係好笑、抑係好噉，總講，大家一日過一日倒垃圾、清潔隊一日過一日收垃圾，臨暗時節愛倒垃圾既經變做大家生活个一部分咧！

倒垃圾同用水、電、瓦斯當相像，係重要个公共事務，順順个時節，人毋多知，係停撇幾日，該事情斯大條咧！像頭擺有兜所在个垃圾無所在好倒，清運發生問題，滿哪都垃圾囤囤摺，黏時斯變做當地个重大事件，準講地方首長跳上跌落暫時出來解決，過幾年又也有可能過再發生，垃圾問題硬硬變做地方發展个陰影咧。還有，偲人个天性係人人會生產垃圾，同時，儕儕又無愛垃圾，該垃圾愛倒哪去？先前，各地大體係尋較偏僻个位所來埋垃圾，過後，埋个所在緊來緊難尋，垃圾又緊來緊多，各地斯

起焚化爐來燒垃圾，垃圾燒過後，量少撇已多，毋過，空氣污染、爐灰清運等等問題又跔緊來，實在講，處理垃圾無恁該喺¹，雖然現下个技術比頭擺進步真多，還係難做到十全十美，盡重點，還係大家愛發揮公德心，共下來垃圾減量，這正係盡好个解決辦法。

愛仰脣正使得減少兜垃圾量呢？基本上，愛做到省用同資源回收兩項。省用斯係少用兜、毋好打爽，同客人「省做」个精神共樣，該用个正用，該省个斯省，比論講，出門自家帶茶、帶碗筷，買東西自家帶袋，省用兜，垃圾自然斯會少咧！續緊斯係愛做好垃圾分類、資源回收，做回收係「惜物」，毋好折福个意思，將紙、鐵、塑膠、玻璃等等使得過再利用个東西收起來，送轉工廠重新變做原料，垃圾經過回收後，定著會減撇已多。

處理垃圾毋單淨係政府个責任忒等，乜愛大自家人共下用心來配合。好得，臺灣有已多民間團體當煞猛在該搵手，宣傳垃圾減量做資源回收，恁多年落來，關心垃圾問題个人，也緊來緊多，總愛大家有心來減少垃圾量，相信偲等个環境斯有機會越變越好。

¹ 該喺：音 goi+ sa`；簡單、容易。